

## KEKI

F.E.M.K. Senkoro

ALIKUWA msichana mrefu kiasi cha futi tano na nusu; rangi ya maji ya kunde, mnene kidogo, mcheshi, ijapokuwa alionekana mkinya alipochoshwa na kazi aliyokuwa anaifanya katika ofisi za Usitawi wa Jamii. Zaidi ya yote, alikuwa mllokole, jambo ambalo lilimfanya asiolewe hadi wakati ule kwani wanaume waliogopa ulokole wake, na walokole wenziwe bado walikuwa wanampima kiroho na, mara mojamoya, kimwili. Au labda alichagua ulokole baada ya kukosa ubavu wa pili. Lakini hayo si muhimu, kwani msichana mwenyewe, Beula, ni shangazi yangu mdogo, na hayafai kuelezwa na mtu kama mimi.

N'nalojua ni kuwa siku ile, mimi na wadogo zangu tulikuwa tunamsubiri kwa hamu shangazi Beula ambaye aliahidi kutuletea zawadi. Tulitega masikio yetu tangu saa nyingi tu kusikiliza mllo wa king'ora cha treni ambayo tulijua ingemleta shangazi Beula siku ile. N'nalikumbuka sana hili kwa sababu masikio ya mdogo wangu mmoja, Esau, aliyatega yakasimama ka' ya sungura vile. Ajabu yenyewe hatukujua hasa ni zawadi gani shangazi Beula angetuletea. Nakumbuka wakati mmoja tulisikia mngurumo kwa mbali, tukakimbilia nje. Kumbe alikuwa ni mbwa wetu dume, Foksi, ametiana kabali na mbwa wa jirani, Malkia.

Hatimaye shangazi Beula aliwasili, na zawadi akawa ametuletea. Mara baada ya kusalimiana naye, na alipofungua ile sandukuyake na kuanza kuzitoa zawadi zile, ghafla tulimwona shangazi Beula anatemeka mwili mzima. Jasho chapwachapwa, macho nje ka' ya kinyonga, na sauti imemkwama ka' ya paka aliyemeza mwiba mkubwa wa samaki. Tulidhania ni yale mashetani yanayowapanda walokole na ambayo hupungwa na makasisi wa kilokole tu.

"Tukamwite mchungaji Eliasi!" Alitoa wazo mdogo wetu Esau, yule mwenye masikio yaliyosimama ka' ya sungura vile. Lakini shangazi Beula alituashiria kuwa hapakuwa na haja ya kufanya vile. Tulisubiri hadi hali ilipokuwa nzuri kidogo, halafu, hata kabla ya kutupa zawadi zile, shangazi Beula alieleza kisa kilichompata.

## II

MSICHANA alikimbilia behewa la treni. Alikuwa amebeba sanduku moja ndogo na mkoba mweusi,; na mizigo hii, japo myepesi, ilifanya ukimbijaji wake uwe wa shida kidogo. Jana yake usiku alichelewa kulala kwani yeye na wenzake walisali na kusikiliza mahubiri na ushuhuda hadi usiku wa manane.

Aliitua mizigo na kusoma namba ya behewa lake. Halikuwa mbali na pale alipokuwa, ijapokuwa uchovu na jasho jingi vilimfanya alione behewa lile kuwa liko mbali. King'ora kilishalia, na mara tu baada ya kuingia katika behewa lake, na hata kabla ya kukaa vizuri, treni ilianza kuondoka.

Alitafuta kiti, na kwa bahati nzuri treni haikuwa imejaa sana. Alikwenda moja kwa moja mpaka mwisho wa behewa kulikokuwa na nafasi nyingi. Baada ya kujitupa kitini na kuanza kupangapanga vitu vyake, aliamua kwenda mgahawani kujitafutia chamshakinywa. Alikuwa hajapata chai ya asubuhi kwani, kama ilivyoelezwa, alichelewa kulala na kuamka vilevile. Kule mgahawani alikuta kumejaa watu wengi mno, hasa wanafunzi wa shule za sekondari ambao walikuwa njiani kuelekea likizoni. Walikuwa wamechukua nafasi zote za kukaa.

Alinunua keki moja na soda ya *Fanta*, akaamua arudi behewani mwake. Alirudi, akakaa na kuanza kula keki na kunywa soda yake. Ndipo alipong'amua kuwa mbele yake, kwenye kiti kinachotazamana na chake, alikuwa kaka mwanamume mmoja wa makamo, aliyevaa kanzu nyeupe, koti jeusi, kofia kichwani kama zile wanazovaa wachungaji wa Jeshi la Wokovu, na kitabu cheusi mkononi. Inawezekana kabisa kuwa uchovu aliokuwa nao ulikuwa umemfanya hapo awali asitambue kuwa mbele yake alikuwa kakaa mtu mwingine. Mtu yule alimkodolea macho hadi akayashusha yake chini, labda kwa aibu, woga, wasiwasi au hisi fulani ambayo hakuweza kuiieleza. Alikuwa hakumsalimu mwanzoni, na aliamua kuwa ingechekesha akimsalimia sasa. Lakini mara ile, mtu yule alifanya jambo la ajabu ambalo lilimshtua Beula. Kule mgahawani Beula alipewa keki na kisahani cha karatasi, na alipokaa pale kitini aliikata keki ile vipandevipande, akakiweka kile kisahani chenye keki katikati ya mapaja yake na kuanza kula. Kabla ya hata kumaliza kipande cha kwanza, alishangaa kumwona mtu yule ambaye bila hata kusema neno moja, alinyoosha mkono wake akachukua pia kipande cha keki ile na kukibugia harakaharaka. Beula alipochukua kipande kingine, mtu yule vivyo hivyo, tena sasa alikuwa anavila vipande vile si kwa haraka sana. Yakawa kama ni mashindano ya kula vipande vya keki, na kila mmoja wao alipokula kipande cha mwisho alikila harakaharaka mno, sawa na alivyokula kile cha kwanza. Hapo mtu yule alicheua kwa sauti ya juu na kuanza kusinziasinzia huku akitabasamu.

Beula, akiwa bado ameduwazwa na matendo ya mtu yule, alikunywa polepole sana soda yake iliyokuwa imebaki, akiwa hajui atabasamu, akasirike au ajinyamazie tu. Mara tu baada ya Beula kumaliza soda yake, mtu yule aliinuka ghafla akaelekea kule mgahawani, akawa amekiacha kile kitabu chake cheusi pale kitini kuonyesha kuwa angerudi. Beula alikichukua kile kitabu akakitazama harakaharaka. *A Touch of Infinity* by Howard Fast, alisoma kwa mning'ono.

Mara ile, yule bwana alikuja akiwa kabeba soda moja ya *Pepsi* na keki kama ile aliyoila na Beula, pamoja na kisahani sawa na kile cha Beula. Ila, badala ya kukaa

pale, alikichukua kile kitabu chake akahamia sehemu nyingine katika behewa lilelile, akakaa na kuanza kuinywa soda na kuila keki yake.

Moyo ulikuwa unamwenda mbio Beula. Hakujua tena kama ajinyamazie tu, akasirike au atabasamu. Lakini mara ile alijikuta anainuka, akaenda kule mbele ya behewa alikokuwa kakaa yule bwana. Kwa bahati nzuri kulikuwa na nafasi nzuri kama zile walizochacha wote wawili kule nyuma ya behewa. Beula alikaa, na bila kusema lolote, aliupeleka mkono wake katikati ya mapaja ya yule bwana kulikokuwa na kile kisahani chenye keki. Yakaanza tena yale mashindano ya harakaharaka, halafu mwendo wa pole, na hatimaye harakaharaka tena.

Baada ya mashindano kwisha, Beula alirudi katika nafasi yake ya awali, akakaa na kusinziasinzia akiwa anatabasamu, hadi king'ora kilipomwamsha kumjulisha kuwa alishafika. Alichukua mizigo yake na kuanza kushuka akiwa anajaribu kuangalia uso wa yule mwanamume. Inaelekea alikwisha kushuka vile vile kwani pale alipokuwa amekaa palikuwa patupu sasa.

Beula alikodi teksi na kwenda moja kwa moja nyumbani kwa kaka yake alikokuwa akiishi kwani alikuwa hajakata nyumba pale mjini.

Baada ya kupokelewa kwa shangwe na hoihoi nyingi, hasa kutoka kwa shangazi na kipenzi chake, Esau, yule mwenye masikio yaliyosimama ka' ya sungura vile, Beula alianza kutoa zawadi za nguo alizokuwa kaja nazo. Ijapokuwa kazi ya kuifunga sanduku haikuwa na ugumu wowote – kwa hakika ilikuwa kazi aliyoifurahia kwani alipanga vitu vyake kama alivyotaka, sasa kazi ya kuifungua ilikuwa ngumu na ilimchukua muda mrefu kuifungua sanduku aliyokuwa kaifunga imara kabisa.

Ndipo, baada ya kuifungua sanduku, alikuta katikati ya vitu vyake, keki nzima kama zile mbili walizoshindania na yule bwana, pamoja na kisahani kipya cha karatasi.